

四庫全書

集部

欽定四庫全書

咸平集卷十九

宋 田錫 撰

古風歌行

西樓殘月歌

西樓置酒賓客歡
西樓酒闌夜亦殘
汪汪月華如玉盤
酒力不禁明月寒

倚柱吟

暮春慘慘黃昏雨
零落櫻桃斜掩戶
未張燈火簾幕深

樓閣巢寒聞鶯語昔時常說長安好而今厭走長安道
蘇秦辯說長卿才自笑功名胡不早人悄悄倚柱時情
脈脈無人知憐春惜遠情不盡斜雨蕪花閣濕衣

李謨吹笛歌

洛陽少年稱李謨衆推橫笛多功夫當時教坊第一部
算得比伊皆不如天津楊柳籠橋綠隴月澹烟何處宿
不怕金吾禁夜嚴偷得新翻禁中曲曲中次第能記持
盡向橋欄閣譜之性聰心慧歸來習分明把向月中吹

五音嘈噴相挽出呼宮吸徵尤竒崛誰羨曹綱善琵琶
未說陽陶能感策纏聲不斷如連環重聲忽轉如迴
山清新不比落梅曲飄飄乍象霓裳翻碎節繁音交書
驕南箕鼓風簫籟窄一斛明珠一索穿撒落金盤催曲
拍錚掄大抵聲雄豪歷歷出羣宮調高豐隆驚得蛟螭
起雨赴雲隨初嘯嗥每到換頭多頓挫一聲忽迸疑轟
破玲瓏祇許牙枝催清脆不容他樂和宮城響應聲更
渾夜靜月明諸處聞何人懶憶馬南郡知予已勝桓將

軍明皇上樓初聽得聽罷沈吟都不測宣令徧詢坊巷
中旋使玉人捕入宮李謨悉心以實對皇慈由是寬其
罪後來落魄如散仙扁舟玩月江湖天繡囊探出金線
管揚眉舐唇徒自憐驚神動鬼吹一曲指法尤高氣海
圓波浪無風帖然靜千里水面鋪輕烟水族精靈潛鼓
舞老龍變見來相顧因將鐵笛相對吹李謨未識無驚
怖乃知藝但出衆竒不獨人知鬼亦知

峨嵋山歌

高高百里一屈盤
八十四盤青雲端
星辰淋漓瀉瀑布
嵐樓雪寺五月寒
殘陽忽黑雨電飛
霹靂火著枯杉枝
登臨慨然小天下
迴時一顧東海涯
細看朝陽初出時
火精轉毬百尺圍
瞳瞳矓矓浮在水
峨嶠朝雲已如綺

采蓮曲

南谿秋水深淪漣
南村美人來采蓮
蓮花灼灼葉田田
芳桂輕撓蘭作船
采采紅蓮幾成掬
蓮枝交袞相撐綠
蓮葉滿衣金粉撲
蓮子為盃葉為足
唱歌相並畫舸舫

願得采賢如采蓮
樊姬昔時進燕趙
幾人精彩朝霞鮮
中有二人賢於已
柔明婉順君王前
堪嗤羊侃錦繡妾
艷歌留怨朱絲絃

紫雲曲

沈沈鸞殿垂珠箔
祥烟瑞氣含樓閣
三十六宮明月中
夜靜無風花自落
寶屏珠帳一夢時
靈仙初降趨丹墀
烟衣霞綬赤映珮
鈞天樂部前參差
合奏鏗鏘向金屋
云是仙鄉紫雲曲
朱絃遠召舜湘靈
鳳管應呼秦弄玉

天漢星流夜既闌
露零珠樹彤庭寒
芙蓉枕上夢初覺
猶聞庭際聲珊珊
上曉五音十二律
仙曲記持心歷歷
金線龍頭紅玉笛
新聲吹得情飄逸
應是夔襄樂府魂
翻得雅音聞至尊
俾與霓裳羽衣曲
遞相奏向梨花園

春洲謠

衣鮫綃兮美人采白蘋兮
水濱裊翠翹兮為飾步羅襪
兮生塵絲絲兮遠道萋萋兮
芳草遠山眉兮澹掃

夜宴詞

天如瑟瑟盤
恢廓億萬里
古稱天傾西北
半在地夜轉
繁星磨海水
逡巡轉上星
彩高北斗未定
光飄飄楚王
夜北張華宴
紅綃燭籠滿
宮殿美人歌舞
雲雨迷不知
寒漏催銀箭

送春

花飛霏霏柳依依
留春不住送春歸
春歸何處堪圖畫
春盡江南日暮時
黃鸝啼多芳草遠
青梅子重楊花飛
人生三萬六千日
與君復有明年期

暮雪

北風慘慘生微雪
微雪片片皆橫飛
梅花柳絮隨人歸
黃雲千里凝無輝
唯念蓬萊何處客
緼袍不暖饑且羸

短歌行

曉月蒼蒼向烟滅
朝陽熒熒明丹闕
杜鵑催促躑躅開
鷓鴣已鳴芳草歇
芳草苦不為君留
古人勸君秉燭遊
願與松喬弄雲月
紫泥仙海鸞皇洲

贈宋小著

紫皇御天方視事將擇靈官補仙吏金波古殿寒星簾
虹節蜺旌觀就試白哲仙人皆雪衣衣冠森列蟾蜍墀
寶盤初賜紅霞饌斗魁挹酒空淋漓水精地上宮花折
枝何渥丹花艷白高於建木老於椿其名仙桂長含春
又有驪龍長萬尺波濤為屋淵為室逆鱗滿頷如鋒鋌
觸之則怒無人當旁有明珠夜月光宛轉炫耀生靈芒
能探驪珠折得桂方許驂鸞駕鳳凰方令碧落為星郎
所以房星之精姓東方字曼倩受天命佐炎漢昂星之

靈其姓蕭其名何貴為相封於鄴復有中台稱茂先讀
書三十車乃為晉朝輔相之大臣又有長庚字太白下
筆一萬字是為唐朝之俊人予知下則誕而為俊傑上
則列之為星辰君曾再對珠旒試君才堪作仙宮吏驪
珠粲粲蟾枝香紫烟華綬黃霓裳風裝雲馭慣升陟太
霄瀚海嘗翱翔願以橫天之鵬為逸駕垂天之虹作飛
梁馳雷走電以驚策叱風揮雨前啟行結大精珮雲錦
章隨君一至於仙鄉

琢玉歌

藍谿中荆山峯結靈凝粹生羣玉飛英蕩彩如長虹野
人初向深崖得躡著雲根風雨黑滿地晶熒雪霜色特
達天安幾火識治玉之工初琢成熒熒輝彩鏘鏘聲方
瑚圓璉薦宗廟蒼珮玄圭頒帝庭堯兵曾用丹浦戰漢
斗已碎鴻門營我願琢為北斗柄指麾五星齊七政庶
使陰陽造化機四時六氣隨吾令

咸平集卷十九

欽定四庫全書

集部

咸平集卷

二十一
二十二

詳校官國子監司業臣納麟寶

檢討臣何思鈞覆勘

總校官知縣臣楊懋珩

校對官中書臣葉蘭

謄錄監生臣王廷璧

欽定四庫全書

咸平集卷二十

宋 田錫 撰

古風歌行

訓陳處士詠雪歌

潁川處士情高古，閒卧煙霞向南浦。
忘却簞瓢陋巷貧，耽嗜琴書醉歌舞。
昨日西風生凜冽，江天慘慘陰雲結。
雲色蒼黃千里同，晚來旋旋飛輕雪。
寒條黏綴生梨花，梅飄絮蕩相交加。
危樓粉飾軒牕冷，橫橋玉碾欄干斜。

高人嘯傲吟情動，醉拾江毫呵曉凍。狂才意度若元白，
滿牋靈怪如麟鳳。因遣橘僮封寄余，門者稱有陳君書。
展開詠雪六十字，水晶盤中明月珠。字字纍纍可編貫，
句句絲絲意不斷。恨無瑛瓊奉報，詎勝得美人錦繡段。
君不聞吾皇在上，致太平地不藏珍。天降靈時聞刺史，
奏河清又報諸侯賀。景星君心幸有經綸術，休向江湖
隱聲跡。雲眠雪嘯意雖高，爭似金門待赭袍。不必虹綸
千二，撈明月為鈎釣巨鼇。

桐谿行

東郊驛樹連理枝西廟叢篁十丈圍堪將輕素命人畫
賚為方物歸京師公署石楠圓似蓋畫樓北面當廳檜
桐谿怪石勝太湖賤如泥土無人愛天生爾材地且卑
空山老朽人不知人不知睦州右史作歌詞

苦寒行

昨日北風高霏霏滿天雪千里六出花六日飛不歇深
山深一丈樹木凍欲折平地盈數尺市肆不成列覆物

生輝光照人清皎潔紫塞羣玉峰滄溟白銀闕篔簹竹為
琅玕松風篩玉屑官吏來參賀物情亦感悅瘴癘已消
除豐穰及時節長吏因疾恚請假來一月病眼為寒昏
風頭因冷發湯藥厭服餌酒肉悉罷輟夾幕暝重簾爐
茵與衾褐祿粟不憂饑帑俸無乏絕江海主恩深素餐
心激切兒童溫且飽當風沂凜冽朝索暖寒酒暮湏湯
餅設不知有飢寒燈火夜暖熱越人輕活計春稅供膏
血及至風雪時日給多空竭樵蘇與網捕負薪水路滑

口噤無言語股栗衣疎葛藜藿不充飢凍餓多不活慙
惶襦袴恩旁皇空殞越因作苦寒行聊與兒童說

訓桐廬知縣刁衍歌

詔守江西新定郡二年撫俗誰相問白浪青山繞郡城
卧理煙霞稱嘉遯帝鄉迢迢天一涯子牟戀闕人不知
慷慨情懷何企慕宋璟政事杜牧詩六縣萬家人輯睦
魚鹽利人茶貨足公家事簡案牘希芳草踈籬映空獄
楊柳湖邊觀釣魚芙蓉池上靜看書優游天爵浩然性

貴如三入承明廬靖節先生來訪我欣然延入黃堂坐
斂襟欲坐先發言捧出尺書雙袖間七軸好辭同跪授
儒雅禮豐情意厚主人識鑒非延陵金石何煩榮固陋
且寘瓊瑤未暇看高談如綺有餘歡黃鸝百轉天欲暮
客去斜陽已半軒焚香道院無人到花風拂几收真誥
却取文編一一看南朝體制多淵奧兩軸七字五字詩
珠貫纍纍樂府詞古於禪月畫羅漢麗於范蠡進西施
議論精微窮理窟賦詠升高能體物一篇序送周子通

飄飄思若翻冥鴻自有滄浪高尚志因人命筆生辭鋒
嘗聞水國清輝殿曾事吳王侍文宴田園未遂歸去來
嚴子臺邊知一縣古人窮則善一身達則惠澤如陽春
一邑生靈如受賜何須兼濟方為貴金門吏隱能安身
何必棄官為逸人桐廬山水幸堪賞歌詩誦唱且相親
贈別琅邪評事兼寄兩制舊友

醴泉少府王評事秀氣神清好竒異讀書擊劔善彈琴
仲容信是青雲器我從蜀國來咸秦長安久客多風塵

因此移居清渭北與君在彼初相識相識經今二十年
支離契濶長相憶去年罷直西掖垣君亦醴泉方解官
關中路遙宛邱道不遠千里來相看我參淮陽知郡事
郡齋喜聞嘉客至槐花黃時初到來菊花開時言欲回
主人忙留留不住為君看菊登高臺高臺臨古道北走
音奏漢書曰還京秋已老白日遠長安西歸出關天已
北走卽鄆道寒神仙作尉道雖在骨肉為累心且寬與君俱年五十
一老去時光轉堪惜况今秋暮冬欲殘七十惟餘十八

年未知十八年之間悲歡得喪與險艱到得七十即為
幸此外浮生何足言明日正逢重九日未忍與君張祖
席樽前新菊含露滋茱萸丹寶星離離茱萸擷芳菊延
壽壽酒滿滿莫固辭淮陽郡吏若早替帝鄉即有相見
期兩制交朋若相問為我勤勤多謝之

訓宋湜賈黃中二學士菊花之什兼呈諸廳學
士

靖節先生曾賞菊東籬有霜花正開翰林主人共賞菊

北門吟咏有餘才一唱再和才力健兼金酬以瑛瓊瑰
善歌使人繼其志遠寄淮陽知郡吏淮陽郡中方燕居
跪讀重緘尺素書中有五章章八句復有二章同一處
五章千葉菊花詞一章副翰學士詩一章訓和季左司
人前再讀與三復人從日邊初到時斂手先問諸學士
駭目乍閱文字竒兩制別來今已久朝寄宛邱權太守
眼底惟嫌簿領繁耳冷不聞騷雅言重陽錫宴不得與
湛露空思奉至尊忽捧新詩若為意聞詩勝得千金賜

受知益感恩顧深吟賞請言清麗致清如玉樹生天風
麗若露花開錦宮水晶盤中置明月絳火珊瑚枝葉紅
珍則難誦青玉案文律詞鋒并化工因事喻懷堪自惜
神化丹青與刀尺丹青暈淡刀尺裁先春雪中生早梅
春饒桃李及時發牡丹占斷芳菲來芍藥羞人嬌且妬
玫瑰倚欄笑欲語帝里春從何處歸巫山雨散朝雲飛
遺紅墮翠歸天下不失年年三月期天生百卉各有時
彼何大盛此何遲蒹葭蒼蒼凝白露西風蕭蕭向秋暮

月華籬落有霜華映籬叢薄生黃花花寒葉冷無蜂蝶
因無寶馬與香車每逢九月當重九暫時采擷浮樽酒
金鈿浮動萬歲盃為君慶祝南山壽菊不能言為作歌
金壺酒傾生綠波重臺千葉若堪賞栽培好近金鑿坡

進瑞雪歌

聖德昭彰動天地歲歲豐穰為上瑞明年有閏節氣遲
冬深有雪方及時三農但喜及時雪天心帝力豈得知
臣忝頒條居近輔勸課農桑理輿賦宛邱之下為封部

宣布皇恩愧襦袴王澤流而有頌聲因而拜手獻歌行
歌云歲云暮今日云暮白雲初向斜陽度斜陽韜掩雲
舒布慘慘陰風生北戶風來帶得霏霏花花輕片片如
瓊葩凍黏寒綴紛交加陌上逡巡鋪玉沙琪樹瑤臺相
間出落梅墮絮初堆積暎箔橫沾翡翠紋拂窻斜度瑠
璃隙飄飄千里度龍山表大蕭關與玉關海上銀臺對
金闕水精簾櫳鑒明月萬年枝上夜輝光上林先似梨
花發黎元有望復滿望手足舞之而蹈之因思去歲在

京師國家將議改元時時雪未呈盈尺瑞百神奔走應
禱祈海風吹起澄江練織女金刀碎裁剪剪作天花撒
翠微茫茫六合生光輝明月宮中玉白杵霜兔持藥雲
母飛風篩乍似琅玕寶翔鸞飛下啄瑤墀金門廊廡龍
尾道賀雪千官赴朝早吾皇為喜表豐年六出飛花不
令掃樞相侍臣初奉宣宣赴中書賜御筵光祿移厨供
玉饌上樽賜酒中官勸宣令不醉不得歸席上仍令各
賦詩詩成封進同奏謝御製歌行競傳寫拜舞歡呼感

聖明千年遭遇作門生
微臣忝幸在兩制得以歌詩樂
太平而今出典淮陽郡
組綬輝華佩金印才微任重副
憂勤履薄臨深守廉慎聖人德澤如陽春
陽春及物無不均
微臣懷抱如葵藿葵藿向陽堪喻身
今因瑞雪獻歌詠西垣再願續絲綸

留別句中正學士

玉人欲歸留不住
南山出雲作朝雨
雨中却柅使車輪
主人重得延嘉賓
嘉賓有詩留別我
句句高竒字字新

新若新花凝宿露高似秋天曉星布奇於雲起成峰巒
鮫人淚珠盈玉盤浪大月照如金線金線交加珠可貫
玦離環合間珠圓風生玉步聲珊珊珍奇若此為重賜
齋沐焚香然後看三復吟看既忘倦命筆和來才思緩
桃李難訓瓊玖珍野老美芹聊贄獻與君俱是錦江人
今幸星輶來過陳鄉情交分忍輕別少留可待早秋辰
秋光月華伴行色步步隨君歸紫宸

代書呈蘇易簡學士希寵和見寄以便題之於

郡齋也

金殿嘗聞金口言詞官近職是神仙三年偶忝西垣職
致身似得文章力感激思訓聖主恩危言所以難緘默
出入金門與玉堂屢因狂直拜封章禦邊救旱無上策
言辭不足動君王改官出職歸郎署粉闈正秩慚叨據
仍命淮陽頒詔條元正不得與趨朝中書舍人捧寶策
加美徽稱尊帝堯大明殿裏上壽酒翰林學士先羣寮
獨有淮陽知郡吏為典郡符蒙借紫閣門引謝正衙辭

撰日念念辦行李都門柳色早春天繁臺寺中排祖筵
離盃滿勸不惜醉醉別上馬魂黯然客心易感須如是
迴思故國三千里子雲相如俱蜀人我今五十君青春
春秋鼎盛正清貴我年漸似下車輪下車猶未踰暮月
官舍初經禁煙節殘陽乍聽吹角聲臺榭梨花簇香雪
獨酌不歡何所為孤懷無緒懷已知十八學士相念否
應笑骨凡格且卑地仙敢言謫仙宦海槎却有上天時
陳州去京地不遠莫惜音書來慰勉若得工夫可作歌

歌中言語不厭多畢三情旨頗似我向二宋四及李大

請與副閣王舍人呈以此歌希唱和

畢相士安向相敏
中宋給事湜李相

沈副閣

王禹偁

送韓援赴闕

逢君南浦落花時送君南浦草離離魂自與白雲斷
兩槩去時乘夕暉昔時漢家稱八使登車便有澄清意
吾皇宵旰念黎民歌詠皇華遣使臣昭文館殿選學士
巡撫使名名號新二人分得淮南道人自日邊來既早

敷宣朝旨達君恩
淮陽父老私有言
言逢太平歌且舞
利病達聰皆悉聞
我昔南宮與西掖
後來謫宦為遷客
慶澤量移往單州
長淮途次泊孤舟
昌黎工部未相識
一見怡然如舊游
詩酒論交各相許
何如李白杜工部
海上往來將月餘
煙波寄詩兼寄書
書裏情深若江漢
詩中意重若瓊琚
今說歸京忍輕別
別夜波光蕩明月
若到朝廷話鄙夫
為說子牟心戀闕
闕下交遊憶者誰
翰林蘇異韓損之

韓五字損之

憑君與達相思意
夢向金鑿

款北扉

思歸引

河朔受詔書移官向湖外初問禁法茶次問丁身稅稅口徵四百茶利高十倍老死及充軍縣籍方消退米摘不入官公家定科罪何以昇平時遺民猶未泰何以在位者興利不除害我願罷秩歸天顏請轉對一言如沃心思波必霧霈

歸去來

歸去來詩不云乎王事一埤遺我兮終日孜孜心力疲
勞齒髮衰爾今已年五十二前去七十幾多時爾性雖
拙頗好學爾才雖短頗好詩文學歌詩之外非樂為金
門玉堂若無分隨分官職胡不歸苟能遣得婚嫁累又
何苦憂伏臘資爾不聞仲尼曰飯疏食飲水曲肱而枕
之樂亦在其中浮雲富貴非爾宜表聖表聖爾當念茲
而在茲勿使無其實而有其詞爾若捨靈龜而觀朶頤
母乃見爾癡爾癡

欽定四庫全書

咸平集

十三

全宋文卷之二十一

卷二十

咸平集卷二十

欽定四庫全書

咸平集卷二十一

宋 田錫 撰

頌一

河清頌 并序

臣嘗覽圖牒曰河千年一清聖人之大瑞也考鄜元之
水經稽夏書於禹貢洪河千里一曲上應雲漢發崑山
而疏砥柱貫中域而注滄溟駭浪朝宗通濁涇而一色
行長薦祉帶清渭之澄瀾所以彰睿聖之乘時表升平

之應運自陛下臨御十有三載以堯舜之道行風教以
文武之德化要荒禮讓興而刑罰清兵革偃而邊防靜
五星不差於軌道百穀屢報於豐年信及豚魚應大易
中孚之象仁敷草木協國風行葦之詩諒壽域之可躋
宜華封之來祝是以功成則韶濩之音必作理定則俎
豆之事畢修方潔祀於先農式告虔於后稷青壇翠幄
列於國門之東蔥蒨縹衡寘彼公田之次五輅南轅之
在馭三推御耦以將親粵若澶淵之濱雷澤之澦獻歲

發春之五日東風解凍於層冰初漣漪以成文旋浩渺
以交漾澄清見底榮光襲人沉潛可鑒於游鱗浮動遠
涵於瑞日守土之吏乘輶之臣會父老以載觀馳牋章
而上達聖恩宣示瑤圖讓德於園靈臣下歡呼金門拜
表以稱賀百執事蹈舞以就列億兆衆歌詠於逢時豈
不以立德升聞而象緯呈休王澤旁流而山川薦瑞矧
太史鈎盤之經瀆桃花竹箭之迅湍人壽之言古賢惜
其難俟靈源之異聖出慶於榮觀與夫芝房寶鼎之歌

瑤壑醴泉之詠豈同日而言哉臣忝竊代言慙非稱職
歌時樂聖合陳葑菲之辭載筆侍耕得紀河源之瑞頌

曰

聖主千年運洪河九曲清地靈儲慶異天意屬升平冰
泮頽魴躍波搖瑞氣生遠通靈沼液高徹絳河明漢國
慙為帶滄浪愧濯纓鑒人曾爽澈潤物達勾萌明月兼
淮暎榮光向海傾王正春尚淺帝甸雪初晴萬國觀農
祀千官侍御耕奏章馳象魏拜表會公卿薦祉臻川瀆

言祥白水衡出圖同表異習坎象持盈珠濺龍門溜雷
奔砥柱聲瑩宜清渭合湛可玉壺盛更顯皇猷洽彌彰
理化行百王堪讓美三代豈稱英深廣源流遠涵濡品
彙貞土膏承積潤水澤効殊禎羣后思東觀吾皇待告
成徽臣獻詩頌葵藿比忠誠

籍田頌

并序

國家嗣位之十三載王道清夷邊防靜謐時和歲稔遠
至邇安籍田可復於躬耕后稷宜修於祀事足以勸三

農之本備九年之儲貴戚知稼穡之艱難宗廟享粢盛之豐潔於是坐朝堂以端拱召公卿以就列謂三事大夫曰邦國之本惟民也黎元之命惟食也使男有餘粟女有餘布老者得衰羸之養少者知耕稼之勤衣食既豐禮節自曉然後風俗易化刑罰不用母乃為王者之所務乎羣心允諧百辟聽命由是金門曉闕御札初下布告自邇以及遠號令雲行以雨施翌日命宰臣昉曰籍田大禮爾為之使俾禮典詳而樂章備百職舉而千

畝修又命翰林學士宋白賈黃中曰爾等司訟革於禮
儀典導從於鹵簿然後百執事駿奔走各奉其職無曠
厥官洎獻歲發春乙亥御辰農祥晨正農事將起六宮
獻種稔之種千官從耕籍之儀金輿玉乘和鸞萬騎以
翼衛東郊南畝華夷億兆以駢觀我后冕而朱紘躬秉
黛耜坻場染屨御於三推公卿大夫自五至九庶人終
畝禮容皇皇若煙非煙和氣翁鬱拂青壇而暎翠幕藹
春堊而麗朝陽既而奉常變六樂之懸太僕進六駢之

竿而赦天下所謂聖人作而萬物覩王澤流而頌聲起
臣職居禁掖才愧司言顧續誥以非工寧裨潤色因待
耕而獻頌用慶升平美盛德之形容紀皇猷之萬一也

頌曰

聖主文明時方太平四鄙無事萬邦咸寧貫索星稀所
以措刑秦階文符可以偃兵物俗丕變禮讓興行條風
塊雨年惟順成屋粟里布歲有常征濟濟之衆蚩蚩之

岷若登華胥若造大庭籍田之禮歷代久廢乃下御札
宣示中外乃命有司詢謀經制祖述三皇憲章五帝燭
潔之享割牲奠幣清明之誠三酒五齊后稷豆籩先農
壇陞鐘磬羅列冠劍繁會千官侍耕諸侯助祭居靡都
鄙人無華裔疊迹駕肩倚裳連袂觀我耕籍勸民樹藝
布德覃恩行慶施惠惠澤霑流天光下濟禮儀彬彬文
物皆新聖德動天至誠感神嘉雪應候和氣先春梅飄
灑道絮落清塵馳道若砥列幄如鱗鹵簿雲羅車旂星

陳輝輝煌煌闐闐麟麟三推禮畢五路迴輪普天之下
率土之濱知我勸農悅我為民彫幾返朴風化還淳廟
祧之享烝禴之辰蕭茅啜酒籍田而有黍稷粢盛籍田
而取潔其簠簋豐其俎豆致享藝祖展禮先后祝史正
辭神降之祐繁祉來宜戩穀允受時歲豐穰生物暢茂
帝王之孝永言在茲黎元之本莫重於斯惟倉惟箱如
京如坻有醴有酪為盛為粢神既歆之民實賴之臣參
詞臣官為右史因獻斯頌得以言事鄉飲之禮行之甚

易庠序之學復之可以古典鬱理由人振起千載一時
允謂昌期時不再來臣實惜之登封降禪願陛下行之

太平頌 并序

聖朝垂統十有八載皇帝以仁賢之德由晉邸而即大
位嗣王業而承廟祧天地氣和日月貞明協千齡之會
昌應萬民之推戴昔舜有大功二十而堯以鴻圖付之
漢文以五讓天下而公卿大臣立之推魯史之遺文得
漢家之故事儔功比德吾皇兼之稽義文出震之格言

徵戴禮向明之大位黃麾列仗洪寶傳國百辟山呼而
稱賀萬方波朝而會同一之日覃連山作解之恩布率
土昔災之令與民更始趣物於新號令一發罪繫咸釋
雷霆振幽滯江海蕩痕瑕自華及夷逢時樂聖聲悅成
歌頌形動為鼓舞易不云乎天地革而四時成聖人作
而萬物覩也書不云乎民非后不乂后非民不立律歷
有五勝之策圖讖應一人之運夏后得內禪之禮周家
稱大弟之賢公劉積仁然後武王成王享大位高皇撥

亂然後文帝景帝致太平晉以金德王而孝武稱賢唐以武德取而太宗好理在淵或躍所以見王者之興大明方融於是喻聖人之道自天厭唐德昭宗失國四海九州瓜剖豆分朱氏稱梁石家號晉居於岐者有僭王之車服據於鄴者擁圖霸之甲兵金陵繼闔廬之雄南海有尉佗之盛湘潭咫尺與中國稱鄰庸蜀險固以一方自大天子之守不過三千里諸侯之兵何啻八百乘中原鹿走高材得犄角之名海水鯨飛黔首困懷襄之中

害然暴秦之祚纔二世而亡有夏諸子或再稔而謝夫
差劍盾脩武備以方勤叔孫豆邁飾禮容而未暇不有
天命國何以興未遇真主亂無以弭玄穹所以睠命皇
宋於焉勃興獄訟謳歌舍丹朱而歸舜禮樂征伐黜諸
侯而尊王強本弱枝兼亡取亂自茲始也初則滅李筠
於澤潞次則覆重進於維揚南平荆門西舉劍閣命伏
波之將以清嶺表詔樓船之師以克江南繫三偽主生
致闕下求諸前代罕有威武若斯之盛也故匈奴畏服

而請吏南蠻奉琛而納款雖先朝之英武底寧寰區由
吾君之密謀贊成大業昔魯衛為兄弟晉鄭稱昭穆咸
能夾輔王室保扞宗周而春秋紀其勲也昔唐祖革隋
由太宗之功明皇滅燕賴肅宗之力寰區果大定宗社
乃再安故實錄紀其事也仲尼稱其或繼周者雖百世
可知披皇圖而稽帝文揚英聲而騰茂實竟有天下以
文思允恭之聖得邦國社稷之臣始以義和為日官次
以重華錄大政曰棄曰契克諧俞往之言曰夔曰龍盡

協疇咨之命所謂精求理亂明辨凶賢衆賢既登庸四
凶遂流竄然後土階三尺茅茨不剪垂衣而天下理不
亦陶唐善致太平乎洎舜格藝祖纂堯之績輯五瑞以
來羣后巡四嶽而省輿民協時日之無差同律度而必
審聰明咸達樞機不壅猶謂其臣曰予欲左右有民汝
翼予欲宣力四方汝為華蟲藻火之文以汝明之六律
五聲之音以汝聽之猶以上之過失或未聞下之謀猷
有未達法謗木之求理建善旌以表誠語曰舜無為而

理又曰韶盡美矣又盡善也斯乃有虞之克肖唐也至
於禹勤力於溝洫致美於敝冕設簋求謙言之善泣辜
見邈物之仁拜伯益之昌言誅防風之後至傳曰微禹
吾其魚乎語曰吾無間焉大哉湯革夏政應乎天順乎
人用王者之干戈救生靈之塗炭肇征葛伯四國悅之
後戰鳴條天下尊之設總街之大庭訐謨畢至解桎人
之密網歷數攸歸書曰東征西夷怨南征北狄怨斯所
以見禹湯之致雍熙也皆典籍所備載今古所熟聞然

則遠取前王近方聖代則堯舜為帝道也禹湯為王道也舉是四君子而比萬乘主且何愧焉曠數千載之間踰七十君之盛中有漢氏稱刑措而不用迨至唐室有囚釋而自還亦足方駕皇風並驅大道臣今謂繼唐者非大宋乎自陛下臨御以來天下之目顯然觀朝廷之所行天下之耳專然聽國家之所務陛下果以天為貌以道為心以萬民為體以六合為家謂三王之禮不相沿五帝之樂非相襲或因仍舊制或釐革故事發先庚

之教令施渙汗之恩私始以寧邊為遠圖次以納諫為切務振幽拔滯旌賢進能蠲關市之征勉農桑之業哀悼鰥寡惻隱困窮禮高年尊有德封樹降漏泉之寵室家軍疏邑之榮王言如綵其出如綸不終朝而詔下朝堂未及夕而令敷國內纔浹旬而恩均天下宜乎至和之氣感於天地不測之神發為禎祥六辯弗迷四溟無蕩五緯燦編珠之彩三階若懸衡之平雨流潤以如膏雪盈尺而呈瑞閭闔風來而應候貫索星稀而省刑太

史銅渾不失陰陽之節容成玉歷遂更正朔之文驗休
徵考洪範善謀則時寒自應睿聖則甘澤不愆斯皆德
動天以昭彰物有感而通泰語封疆則東際桑林之國
西走蔥河之道日南萬里設都護以懷柔漠北五原化
單于之獷鶩有以見王者之無外書軌大同代馬新羈
願備六閑之御名輦入貢來稱九譯之朝論都邑則陳
留古封商邱雄地仰渾儀則房心之分按地圖則豫州
之域左控齊魏右引淮湖闢里閑以綺紛湊舟車以鱗

萃皇居壯麗信邁漢而越唐都人雜運實駕肩而擊轡
閱文物則司徒以七教理兆民樂正以四術教胄子賢
良待公車之詔俊造升天府之名煥然若重離之明炳
焉得奎星之象諒千古之下與三代同風班馬文章列
芸閣麟臺之次嚴吾侍從居石渠金馬之中觀武備則
精兵三百萬功臣二十四世祖兼昆陽之衆曹公得劉
琮之兵是以軍容益嚴國威大整雖四鄙無事靈臺有
偃伯之期而三農之隙司馬有教戰之法比夫驪山講

武陋唐紹之草儀澤國觀兵鄙楚君之憑軾言盛禮則君尊於上臣肅於下法厚坤之有別本太一以為容民得之則父子親而兄弟和國用之則祭獲祥而戰必勝然後以車服而別之以爵勲而辨之以珩珮和鸞以聲之以黼黻絺繡以文之故百官象物而動九貢不戒而至聽雅樂則五音正六律和用於方澤而地祇升奏於園丘而天神降振作於廟知祖考之來思鏘洋於庭感鳳凰之疾止朱干玉戚兩階見象武之容樹羽崇牙六

佷辨用文之德詳制度則明堂為布政之宮太社為禮神之本金城儼百雉之峻天門踰兩觀之崇謁靈臺以視常文闢太學以優儒教連營碁布若羽林之四十二星列署鱗差比太微之三百六位驗豐富則全齊曰魚鹽之國右蜀為金碧之府南越出珠貝北燕多健馬國家既網羅六合庭衢八荒異物內流而國用饒萬貨均輸而公帑富陋隋文之儉德稱有羨財輕漢武之事邊肇興徭算較版籍則既庶矣又富矣所謂積於不涸之

倉務稼穡也藏於不竭之府勉桑麻也皆陛下躋之仁
壽之域導其生殖之源故比屋可封外戶不閉仲尼觀
蜡退而稱三代之英伊尹持衡慨然慮一夫不獲語臣
寮則廟堂之上得賢相也三軍之師皆良將也可以侔
周之十亂虞之五臣儒雅雍容登瀛洲而論道英雄慷
慨畫雲臺而紀勲功成理定既如彼禮備樂修又如此
陛下猶以本支百世封建親戚恩之先而禮之大者也
乃謂侍臣曰昔周王涖祚以輅車旌旃夏后之璜玉封

父之繁弱迨闕鞞之甲密須之鼓姑洗之鐘商民之族
以為分物用彰國家之庸而賜諸弟封伯禽於魯封康
叔於衛封唐叔於晉左史書之至今稱為美事朕於是
命有司陳玉策冠劍鹵簿鼓吹以營邱四履之國封皇
弟為齊王又命太常以金輅蒨旆鉅鬯圭瓚疏鷄首千
里之封遷侍中為京兆尹又命禮官以虎符獸節赤第
金烏分南梁十四郡之地升太保為興元連帥信堯親
九族周重宗盟楚國析珪稱莊王之九德漢家刑典非

劉氏而不王宜乎皇基若磐石之安宗室比維城之固
庸知卜代之吉何止於三十卜年之永將踰於萬齡君
有威儀而可尊臣有禮法而可仰天下無事海內有截
皇風蕩蕩尊盧赫胥之朝民物熙熙柏皇栗陸之世脫
寶劍以賜騎士却駿馬以駕鼓車惜中人之產而罷露
臺愧吳芮之心而賜几杖集書囊於帷殿列諫疏於御
屏觀明堂以去笞刑畫衣冠而別有罪野老或不知帝
力公卿亦恥言人非行萬里不持寸金消五兵可為農

器海牛南卧遠人占以來朝楛矢東歸旅宰司其所貢
魚在藻以遂性鴉食黠而懷音瑞露凝甘降竹柏之上
景星垂象助晦朔之明器車知厚載之仁丹甑表將豐
之兆蓂生近砌因更月而呈芳芝在中包亦無風而自
動書曰魚鼈咸若詩稱行葦不傷由庚蓼蕭悅道人之
見采芝房寶鼎流樂府以登歌信宗廟之垂靈當地天
之交泰攸宜垂黠續凝冕旒棲神於穆清守道於玄默
游大庭以怡睿覽升姑射以適皇情於是三事大夫率

百職卿士秉桓圭以就列委蒼珮以颺言曰陛下德掩前代功格玄穹古稱因天事天因地事地封禪之禮歷數十世而無覩焉天其命陛下修闕典秩無文哉不然安得民和神悅兮若是乾符坤珍之畢臻臣等遐詳舊儀得之新禮欲願陛下覲羣后於東國展嚴禋於岱宗命虞官相高卑之儀詔掌固施表著之次泰壇三襲祠昊穹之神圜陞四周列衆星之位雲門大濩施於重壇之中勾陳執金周於四門之外玉輅金根翼於道殊珍

衆寶旅於庭庶邦冢君四夷酋長環天壇而序立欽飛
之將羽林之兵衛禁署以增威於是宵漏未盡中嚴外
辨服冕裘而上征鳴玉驚於太清祈昭嘏於萬靈布福
壽於羣萌探金策以受神休封玉檢以成大禮然後勒
丹碑於雲際霈玄澤於天下以彰盛烈也不使七十二
君獨美於古先也皇帝嘉忠誠之懇禱而猶懷謙德而
未報既而聲聞於外下臣得之於道塗不覺拊蹈以為
美盛德之形容無先於頌雖菲才之無取幸昌運之重

熙願以詩聲揚於王庭曰

德厚稱帝仁勝為王仁德兼備謂之三皇天命靡常邦
或其昌吾王嗣位南面垂裳左唐右虞超周掩商大業
於鑠鴻名焜煌二儀幽贊羣靈協祥河圖啓瑞洛書含
章運逢交泰時來允臧君明臣賢禮備樂詳書軌大同
貢輸相望風雨弗迷黎元咸康至和之氣感天之陽日
流嘉彩星垂瑞芒三脊之茅茁然呈芳九苞之鳳飄然
來翔堪備緡禮升告穹蒼泥金載密燎煙高颺鸞車珮

衣交鳴鏘鏘天靈地祇降福穰穰用顯我皇太平昭彰
億萬斯年永永無疆

武有七德頌 并序

聖人守法度以信禁過差以義剪禍亂以兵示人之誠
惟信為速感入之心惟義為速濟信與義惟兵為速兵
不可弭堯舜猶用之以禁暴武不可黷湯武猶戢之以
愛人故周禮則曰兵有九伐魯史則曰武有七德兵者
利用也生殺賞罰出於已旌旗金鼓榮於目摧堅破剛

快於意苟不以道德仁義主張牢籠以彰明武德則淫
戾之過返諸已而驅除之柄在於人也夫物之不附由
曲直相戾人之不親由間隙所生間隙既生曲直不入
則情離意遯心越意去聖人以兵附而麗之合而會之
兵猶器也斂拂戾違慢之國以納諸器而提挈以致霸
王之業其在周易象曰頤中有物噬嗑比天地為頤也
萬民為頤中之物也聖人以甲兵為齒牙噬而合之乃
能通也小則以五刑而大則以五兵威而懷之使心不

離糾而合之使意不散所以大國畏其威而安靖也小國懷其德而慈和也昔周德下衰經武之柄為齊桓晉文所用是以徵包茅示禮遷邢衛示仁伐原示信蒐軍示義故魯衛宋鄭曹邾杞鄆以土地封畛之大小貢賦藝極之輕重奉齊晉以司盟瞻齊晉而為命蓋服有禮而畏有法也在二霸猶然况聖人暢之如天載之如地燭之如日月涵之若江海所加之兵所臨之國非土地是貪惟封疆是正非玉帛是取惟貢職是徵非威武是

耀惟凶慝是服非震怒是逞惟教告是明觀其以兵除
害所以見禁暴之德也以順為武所以見戢兵之德也
有功而不伐所以見保大之德也克亂以築京觀所以
見定功之德也所務不違民欲所以見安民之德也興
廢繼絕所以見和衆之德也動不耗國所以見豐財之
德也暴既禁則兵可戢兵既戢則大可保保其大則功
可定定其功則民斯安民既安則衆自和衆既和則財
乃豐強兵之本在農務農之本在民安民之本在德兵

與農交相養德與刑交相用利與害交相生聖人觀覺而動非七德不妄動也聖人見可而進非七德不妄進也故詩人美禁暴之德則有於鑠之詩在也美戢兵之德則有載櫜之詠在也美保大之德則有允王之篇在也美定功之德則有耆定之章在也美安民之德則有繹思之什在也美和衆之德則有綏萬邦之歌在也美豐財之德則有屢豐之頌在也今國家德兼於堯舜功高於湯武苟不形容盛德蹈舞頌聲則亦司言之罪也

敢拜手獻頌云

於鑠王師煌煌其武如龍如螭如熊如虎以道以德為
鉞為鈇以仁以義為干為櫓惟亂是伐惟凶是取能禁
其暴削其土宇能戢其兵肅其部伍善保其大仁信周
普克定其功禮樂歌舞聿安其民惠若時雨撫和其眾
衆實安堵既豐其財實乎帑庾言有訓誓伐有鐘鼓以
威以懷以招以撫柔亦不茹剛亦不吐孰為厲階孰為
怨府如工理木如農事畝正其徽纆以合規矩去其稂

秀以養稷黍為黎庶君作諸侯主萬方黎元莫子敢侮
小臣獻頌願播樂府

祝網頌 并序

昔夏王縱暴庶民罹毒痛之災成湯修仁四國有旋歸
之意雖空桑之子來翼霸圖而九戎之兵尚為桀用非
至仁無以克敵非全德無以勝妖至仁伊何澤及草木
全德伊何信乎禽魚故盤有銘而敢憚於勤兵以律而
得以專討葛伯有弗祀之過農夫值奪餉之仇湯於是

始行問罪之征用慰來蘇之望諸侯聆之而胥悅生靈
悅之以知歸所謂三分天下而湯有其二猶以為桀雖
溢惡而君不可伐靈矛鉅戟未興時雨之師神蛟應龍
已有躍淵之吉一旦飾高蓋以言邁適郊原以肆懷都
山澤之虞人形殺心而祝網曰自天之降從地以出四
方來者皆入吾羅湯聞之曰嘻盡之矣非桀之徒歟孰
能與於此乃命解其三面更教之祝曰欲左者左欲右
者右高下如之吾取其犯命者於是漢南諸侯咸聞帝

乙之言益知聖人之德由是鼓舞以慕化歌謠而歸毫
一時而至者凡四十有六國書曰惟天輔德其命靡常
宜乎順天人合發之機膺歷數在躬之運進破安邑遇
戰鳴條陳逆順以誓師衆皆聽命以寬仁而伐虐誰不
歸懷遂俘玉於三朶乃握圖於萬乘考緯書之撫實稽
瑞牒於前言有白狼銜鈎黃魚化玉視拱穀而妖亡福
屆禱桑林而雲蒸雨流斯皆動天之德昭彰革命之符
赫奕而尚懷慙德惕然罪已豈非聖人以至公而大權

自獲因勞謙而徽號難辭雖云解密網於一時其實示
深仁於萬國法天道恢疎之象見君恩青肆之懷蓋禮
有三驅釋前禽而不取法踰再赦當撤懸而弗張足以
知有商懷惻隱之仁後代仰高明之德事在世紀安敢
忽諸因作頌以美之曰

網罟之設兮蓋取諸離以畋以漁兮必戒乎時桀惡日
侈兮民心益離湯仁天授兮歷數攸歸解中桎之網兮
更其祝辭諒好生惡殺兮示君父之慈宜其享天祿兮

垂千古而是思

五聲聽政頌 并序

昔文命事堯之明受舜之禪大功赫奕炳於日月至仁
涵濡霈若雨露然以堯之聖猶以謗木聽於人以舜之
才猶設善旌求其過况我臣於唐乘四載而平水土嗣
於虞觀七政而御歷數敢忘踵其懋德師其明規於是
設五聲以示誠俾羣賢而納誨故題於簾曰教我以道
則鳴鼓告我以宜則撞鐘示我以事則振鐸語我以憂

則擊磬告我以獄則揮鞞五音在器五器在懸設於朝
列於庭外以示國人內以示廷臣食土之毛居土之濱
在子之化為予之民苟有道有宜有事有憂有獄必從
予而伸必率意以陳堂雖深於千里善意嘉謨不得不
聞天雖高於九重芻言蕘辭不得不達享子之祿立子
之朝惟子職是守惟子過則規苟有道有宜有事有憂
有獄必從而言必面而諭雖憚犯顏而良規嘉畫不得
不聞雖畏直諫而忠誠赤心不得見筭簾之設有所

取象天有五緯國有五教君有五官臣有五諫欲召五
諫遂設五聲聲如五達之衢廓之而無壅諫如五土之
民懷之而則來鼓之音博而達故使教我以道者鳴鼓
而言馬鐘之音屬而切故命教我以宜者擊鐘而達馬
鐸之音流而不蕩故令教我以事者振鐸而述馬磬之
音哀而思故勅喻我以憂者擊磬而伸馬鞀之音慘而
急故詔示我以獄者揮鞀而至焉處至尊之位持思理
之心聞其扣擊之聲知有謬諤之人耳則矍然心則惕

然或投袂以起或推几以出或仄席以待或怡顏以接
所以下之情無不通也上之過無不聞也是知聖人位
愈高而心愈慎當懷襄之際墊隘是懼慮萬物泊為萍
藻憂萬民化為鱗介竟咨於朝鯨殛於羽水土之職我
專其任溝洫之勤我致其力聞昌言而必拜聆呱泣而
弗視天鑒其勤神贊其功圖出於洛蒼水使授以祕籙
淮渦神鑠於深淵一旦百谷皆導而順流九州大同而
交泰偃豬之地化為沃衍隰臯之土鞠為芻牧土有柔

桑田有嘉穀所謂聖人有巨功於天地也有大賚於生
民也堯既錫以玄圭舜乃授之大寶定公有微禹之嘆
宣父伸無間之言然猶日加慎也夕加惕也慮政有關
恐過未聞繇是建五聲采衆善衆善既至萬機聿理名
愈崇德愈隆道愈彰惠愈洽禹跡萬里禹謨斯在鼓鐘
之器筍簞之用與夫考擊於樂府振作於公宮特異也
退頌聖德以彰鴻勳頌曰

立大功兮享大位慎其終兮德不匱菲其膳兮厚祭祀

惡其服兮美黻屨猶詢賢兮以自樹欲問道兮常自裕
羅五聲兮啟諫路用羣材兮為國輔幹於道兮邦彌阜
基於德兮名轉固不然安得聲為律而身為度

咸平集卷二十一

欽定四庫全書

咸平集卷二十二

宋 田錫 撰

策對一

制策

皇帝若曰國家承五代亂離之後稽三王質文之變太祖以神武定天下太宗以聖文化域中萬里封疆復禹舊跡二聖功業與天比崇德化所被靡不祇若日月所照罔不率俾自開創致升平迨四十年矣朕以寡昧嗣

纂大位遵守先訓慮勿克負荷夙夕未遑寧居惟萬務之幾微鑒燭未明中心浩然罔知攸濟兢兢業業五載於茲矣鎮撫夷夏康濟黎元雖下承成規事仍舊貫庶政用乂寓縣久安屢降詔書旁求讜議五日轉對亦復往制尚慮君子難進嘉言攸伏故詳延賢良方正之士咸造於庭欲聞經國之謀轉時之策明子於大道致子於至理今子大夫其發揮理本宣揚道要順言曰從朕敢忘洪範之訓噫大道之行三代之英仲尼其猶喟然

又書不云乎克念作聖孟軻曰堯舜亦人朕永惟皇王之理思復三代之迹堯民比屋可封舜韶鳥獸率舞夏后魚鼈咸若文王虞芮讓畔何千古難繼其或繼之者厥道何從厥理安在其次適時之務安可忽諸今三邊無虞重譯入貢制獫狁自古無上策禦姦宄不得已而用兵方求聞所未聞得所未得慮契丹乘間屢來騷邊遷賊負恩罔畏干紀致勞征戍每煩供饋供饋出於民力征戍資於國用專利山海殖貨關市或譏王道之未

融豐財於農桑節用於制度其如邊備之未足斯二途
取舍其術安在又古者什一之稅秦氏大半之賦其按
田取租始自何代計口定算肇於何時春秋曰近鹽公
室乃貧管子曰謹正鹽莢其義相反何所適從又勤卹
人隱奉若天道而間歲以來陰陽不和水旱作沴寒暑
罹於疾疫歛儉致其流亡夫安上理民禮樂為急禮以
本天地樂以和神人豈陰陽之或差致水旱以作沴札
瘥天昏流庸浮冗母乃禮樂之用其未至乎嗚呼上失

其道民散久矣講議禮樂予將疇咨觀禮以知興亡審
樂以明理亂非賢臣弗達予大夫懷才抱器學古待問
知己慰薦副朕所求各罄爾之所長交修予之不逮敷
之條對靡有所隱

試同人策

問君子之儒貴乎博物者所務先乎辨疑吾子各蓄竒
能榮采觀國願以咨詢之志畧闕辨博之詞三皇之名
互言靡定五霸之號所載亦殊堯知鯀凶何以用之治

水舜事父孝何以不告而娶范宣之讓能易樂厲之心
文王之仁不變崇侯之惡皇舞用於何際甲歷起於何
時良平之功與謀何人最善韓柳之文與行孰者為優
漢高稱善御英雄何以致韓黥之叛周公有信睿之聖
何以生管蔡之疑幸畧為於指明冀用祛於憎昧

二

問皇家創業垂二十年平楚取蜀係吳破越復三代之
王畧消羣凶之厲階正朔遠頒恩信大布外域爭輸於

貢奉云亭方俟於登封然念三晉遺黎未霑皇澤一方
鉅盜猶保孤城世宗興問罪之師大勲弗集先帝有平
凶之志聖策未伸觀往古之用兵實研幾於料敵山川
形便始務諳詳攻守利害必精計畫昔晉宣決勝以周
碁而可取壽春充國圖邊請益兵而方濟戎捷揣摩之
術毫釐靡差國家以德懷來用衆敵寡佇獻俘於宗廟
方擇善於臧謀子大夫久練時機雅稱國士願畫蕩平
之策勿陳游誕之辭

私試策

第一道

問國家奄有中區誕敷文德考河圖而括地象率土皆
賓蒐兵實而閱武功遠人咸服蕞爾并土猶怙堅城興
周宣六月之征尚聞逆命用虞舜兩階之舞無以懷柔
子大夫榮與國華久諳方畧願聽蕩平之策以觀經緯
之才

對

兵貴伐乎深謀妖不勝乎盛德仁修而獷驚自化備設
而攻取無疑我國家丕建洪圖垂二十載先朝以神武
之畧蕩定天下吾皇以聖文之德撫育中區萬方咸賓
九貢來底蠢茲并土久隔皇風雖懷之以德而弗來震
之以武而未服亦猶鷺營巢而在幕魚失水而居陸雖
暫苟活其能久存管子云料衆以攻衆孟子云王者之
兵惠若時雨今料衆之義請試陳之以國家之土疆遠
且萬里以聖朝之士卒精而且練府庫豐實雖漢武事

邊之財未偕於今矣黎元富庶雖玄宗開元之間未侔於今矣以此衆戰何敵勿克以此衆攻何城不降國家但欲示之以仁而使自知歸化之以道而俾其自服又何疑苗民怙險度七旬而弗歸崇侯弄兵必因壘而方至必欲誅元惡以示法弔遺黎而表恩則兵家之謀有五間之術司馬之法有九攻之義舉必成功動無遺算然兵者詭道戰以誦勝當太平之世實愧言之以威服之以德化之在此二道也謹對

第二道

問以禮化民推誠致道必因讀書方致淳和驗前代鄉
飲之儀見躋俗禮容之盛有唐之後歷代弗修今國家
方屬於升平俎豆諒宜於修襲所冀白華播曲誘孝弟
於深心清管登歌發融和於庶彙嘉言復古虛意待賢
願指明其是非仍發揮於損益

對

先王制作禮樂化導黎元亦猶置水於盤方圓斯就鎔

金成器模範靡遺觀鄉飲之儀喻國人之禮俾日而習
之月而化之聞管磬之音則和樂生乎中矣觀樽彝之
設則恭肅加乎外矣閱賓主升降之容則知尊卑有序
矣熟雅頌誇諭之意則知孝弟有自矣斯禮久廢淳風
未還詳天命之有歸俾吾皇之復古宜乎海內大定寰
中大理日月宣明乎天道風雨咸若乎歲功民心悅隨
物性交泰鄉飲之禮白華之歌願復行之天下之幸謹

對

第三道

聞懷才待舉隨計觀光苟非該博之儒寧稱詢謀之旨
三王禮樂胡不相沿百代職官何因繁省孟子稱至仁
無敵安得苗民弗恭仲尼云積善餘慶曷以丹朱不肖
瑤琨篠蕩貢自何州淮濟江河發於何郡春秋以藏冰
得禮則風雨弗迷洪範以修德動天則陰陽自順惑乎
確論無所適從高談勿吝於辨疑與學用觀乎歷試

對

王者功成作樂理定制禮故唐虞之功成乎揖讓則大章簫韶之樂作焉湯武之理定乎平蕩故司儀奉常之禮異焉玉帛之容取乎化民心不取乎觀閱也金石之奏取乎和物性不貴乎鏘洋也蓋隨時之理亂因時以損益故三王禮樂不相沿也職官之數亦然書曰唐虞建官惟百夏商官倍亦克用又周漢以降迨及有唐沿革不同繁省靡定酌理言之苟得賢才雖簡畧而亦理苟曰常吏雖官繁以何為苗民終服于舞干有以見至

仁無敵也丹朱得備於虞賓有以見積善餘慶也瑤琨
稱珍篠簜充貢貢自維揚之域詳乎有夏之書河發源
乎崑丘江濫觴於嶠冢淮濟之出載籍備存藏冰而風
雨弗迷申豐之言未臻至理也修德而陰陽自順箕子
之辨乃可垂訓也錫淺陋之學不足以待問王庭葑菲
之辭不足以發揮古義傍皇震恐不知所裁謹對

開封府試策三道

第一道

我國家誕膺景命爰創洪圖立萬世不拔之基成四海
混同之化主上大明維照聖德日躋乙夜觀書旰食聽
政訓兵練將以養銳務穡勸農以豐本孜孜不倦豈無
意乎豈不以薊北強藩尚侵禹畫河東餘孽猶保梟巢
然則西北歡盟數世連結畏中原之強盛曲陳款附之
誠憂同惡之危亡潛懷救解之計若擊之則有阻蕃服
來王之意若置之則恐違生靈徯望之心取捨之間後
先安在秀才博達今古洞照機宜來覘國光豈無良策

試為條對將副虛求

對

兵貴伐乎深謀妖不勝乎盛德仁修而獷驚自化備設而攻取無疑我國家光啟寶圖垂二十載先朝以武功定天下吾皇以文德化域中故四裔咸賓九貢來底雍熙之化升平之運今其時矣蠢茲并土尚隔皇風懷之以德而弗來震之以威而未服怙契丹之強援幸同惡以相濟孟子曰至仁無敵於天下管子云料備以攻備

備存而弗攻今國家民俗寧和提封遐遠府庫豐富兵革精練以此勝敵何敵弗克以此攻城何城弗降主上但欲修德服匪人之心養威惜黎元之力何憂有苗民固不歸舞干之化遠人懷詐外示款塞之心而已哉必欲念一方之遺黎釋二邊之逆節則兵家之法曰去其所恃又曰用間有三若以聖人用間之術絕叛人所恃之心則自然盟好携疑而黨援孤子也若是則舉一并二若吹鴻毛則戎人救解之謀無所施焉外域款附之

誠化為信矣書軌混同之策英威蕩定之機在斯術也
昔羊祜取吳猶以仁義吳中感惠不稱祜名矧蕞爾賊
臣安足為聖朝言議也謹對

第二道

問有國者設爵求賢懸科待士雖古今之通制在沿革
以殊途周開俊造之科漢重孝秀之日皆因鄉曲之譽
遂登公卿之府末俗澆薄浮競成風或托勢援以干有
司或假梯媒而取上第有唐季世此弊尤繁今國家以

文教大興古道盡復若采聲華於鄉曲恐漸成朋比之風但令程試於有司又慮開請託之路取士之道何術為先秀才若策於天庭將何辭以待問

對

求賢擇才周禮精其術也升廉舉孝漢制得其要焉何哉士之賢愚審乎鄉黨故鄉舉里選之目王制備焉才之優劣審乎策畧故直言極諫之科漢書備焉觀歷代之取人詳賢才之中選惟周與漢最得其宜迨至有唐

首開貢籍於時中太常之第者尤為寵榮雖公卿之才
自茲而得而仕進之典亦由是興今國家采三代之典
謨熙百王之禮樂精擇賢能之士待以爵祿之榮尚慮
妄干進於有司竊虛名於曲徑莫若損益先王之術審
詳取士之機先試之以經濟之謀後訪以英翹之譽責
其實稱乎名若名實之相符必是非之立辨又何慮啟
幸心於請託鼓虛譽於比周也謹對

第三道

問周均井賦漢重力田皆敦本之良規為後代之成式
稅關市者始防游惰論鹽鐵者亦救弊俗何淳古之漸
漓逐末作而忘返不耕而食者塞路不織而衣者實繁
浮汎之戶漸多兼并之家日富恃豪强者或勢侵於州
縣逼饑寒者亦難守於丘園以至賦籍不增版圖亦耗
近世談論之士亦有沿革之書皆非永遠之謀惟取一
時之利我國家政同三代道邁百王博訪羣謀思臻至
理秀才道窮祕奧識洞古今來副虛求必懷良策且井

田之利可以復於古否力耆之科可以行於今否游惰者何以使之返本兼井者何以使之均濟禁豪強者何法拯飢凍者何術試為縷陳無甚高論

對

昔黃帝設井田之法周文用土著之令故生民之衆寡由是而詳焉王者之征賦由茲而均也洎秦君圖霸商鞅適變廢哲王經久之術濟強國縱橫之用井田遽廢阡陌驟興兼井之弊遂生賦輿之法不一洎漢家垂統

武帝事邊以鹽鐵六管之財佐疆場連年之用未作益甚而黎元愈困後代救時之弊者或以土斷禁流亡之俗或以常平均豐歉之民牢籠萬邦平準百貨信史備載斯言可徵夫井田之賦千古絕迹不可復也力田之科前王所行未足尚也使游惰者返本莫若利其衣食之源使飢凍者相濟莫若抑兼并之人也兼并既抑則貧富自均貧富既均則豪強自禁其術安在在乎王者提利權而均國用也重輕萬貨斂散百穀乃其術焉錫

愧無待問之才幸與觀光之試智策無取方畧靡詳憂
畏徬皇不知所措謹對

試進士策

第一道

問富國備邊實資農戰化民導俗本貴儒立尚立以清
淨為宗尊儒以禮樂為本書稱偃武春秋謂不可弭兵
禮重中庸刑法欲畏如觀火聖人垂訓取舍何從國士
懷才是非必當願聞至理上副旁求

第二道

問聖人之性與天地合故不待多學一以貫之又云終日終夜不食不寢以思無益不如學也垂訓各異其理何從夫臣之事君將順其美而魏徵之諫請停封禪父有諍子不陷令名而瞽瞍不賢未聞諫諍請發揮於古道冀釋去於所疑

第三道

問易道精微王弼之注行之久矣羣儒共傳而云進物

之速義不及利成物之終利不及義嘗思至理其不然乎湯武之兵興於二季豈非義也孔孟之言垂於萬古豈非利乎况裁事得宜而謂之義進成於物豈有異焉幸聞嘉言以祛未悟

第四道

聞書云師古易曰隨時執守則昧於時機適變則違於古道比德於玉仲尼何獨佩象環知幾其神周公豈或罹讒口繫於金柅未詳金柅之定名席上之珍莫辯席

珍之與旨子該通為學茂秀懷才觀光斯來待問程試
幸悉至理以副旌求

第五道

問摘山煮海以資軍儲關譏市征亦禪國用自蒐狩教
習之禮廢而點閱召募之事興乃徵齊民永充士卒又
因廣福碩度緇黃故祠部籍名其衆動盈萬數戎麾隸
役終老不復歸農故一夫之耕支贍靡足一婦之織供
億無餘致田疇少闢於荒閒租賦急用於徵督子有何

術為究斯言

第六道

問井田難復策論已相承備言屯田可興士卒又難為
兩役適來雖聞建議未見成功所以備邊有饋運之勞
積粟無通濟之術其理安在幸為敷陳

開封府發解策

第一道

強學待問儒行所先博物辨疑識者當務成湯七號幸

略紀其徽稱文王九德亦可舉其成數漢雜霸道孝元
之志不同鄭鑄刑書叔向之心特異是非安在取舍何
從荀孟言性之有殊孰者為當管樂立功之俱善何人
最優守道不如守官官非道何以能守教民不如化民
民非教何以能化文行忠信忠信非行歟禮義廉恥廉
恥非禮歟復井田則其議屢聞行鄉飲則其禮尚在方
當明代可舉而行子大夫以為何如幸詳斯言悉意以

對

第二道

古者蒐狩之禮以教民戰征伐之際稽諸版圖里閭有
士卒之名井田賦馬牛之數聚之則蓄為我武散之則
復為齊民洎王道其亡霸圖相繼以兵逞欲以民養兵
兵農由是遂分財用以茲不足筦權以為國計賦租先
於軍儲因茲游惰之人罕務耕桑之業加以不耕而食
不蠶而衣其徒實繁豈可悉數議復古則見非於知變
論適時則思有所聞今沿塞屯田防秋戍卒疆場無事

可力穡以服勤邊塞有虞則被堅以禦侮可以救三時
妨奪之害免千里輓饋之勞佇聞嘉言以觀方畧

第三道

儒者之行難進而易退君子之德先人而後已所以
鄉舉里選既升俊造之名循名責實乃得公卿之器貴
其身所以錙銖視國尊其道故有師傅之稱洎叔世以
還其風不振漢以詔策取賢良方正之才唐設科場較
詩賦文論之藝雖英髦間出豪傑並驅然有進不斧藻

其行能退不砥礪其名節豈俗之澆薄使之然化之敦
勸未至也今議賢良之薦必自於鄉里文行之選不由
於科場冀士林茂三代之英賢路導四科之士佇聆商
較以副薦揚

設邊吏對

昔漢孝武勤兵十八萬北過天山旌旗林殖徑周千里
金鼓不絕聲聞於天匈奴震恐不敢抗威弃銜帳而遁
帝升單于臺有黷武驕傲之色乃有邊吏老矣然精強

矍鑠狀貌魁傑若賈餘勇遂屬橐鞬請見於軍門上召
與語曰若居邊鄙多歷年矣諒諳練戎政而詳悉事機
今天山之北大漢空曠經川通谷平原險蹊車戰之地
騎鬪之場客主便利者凡有幾何其次濫車之水伏兵
之道堡衝壘要峙糧輓芻之所復何從而善若當悉意
以陳朕欲周知其名數期以殄滅匈奴而後已邊吏曰
臣遠祖唐堯時為華封人嘗因祝延洪之壽於堯堯乃
嘉其忠孝命世為疆場之吏俾食關塞之征厥後歷夏

商周以迄於聖代子孫嗣襲不絕臣雖不佞今辱守祖
先之職疆場之事敢有越思於是以山川形便之地堡
壘控扼之勢洎戰鬥利害與烽燧遠邇悉陳於上前帝
益悅而善其稱職命增之寵數邊吏辭之曰臣受國深
恩今數十稔未有塵露裨益敢以口給之對遽欲邀陛
下寵光臣嘗讀家藏之書見唐堯帝天下以清淨為理
先勞精於求賢果得舜於側陋舜由是舉十六相而去
四凶海內大理以至於無為當時遠人慕德咸相率而

朝貢其言具列於唐虞之書及禹貢載要荒之義是也
舜禹繼堯而理不更其道故有明珠大貝奇器良馬迭
充王庭有以見皇風王化覃及殊俗梯航險深而至者
然於時不以窮邊極裔為意而以脩德化下為先洎太
康喪國四方來侵賴后相纂嗣且征且討或叛或服然
德信衰薄未足來遠迨成湯文王勉道勤仁故羌髡鬼
方復修朝貢大約道德服人之心而兵革制人之力與
其制人之力曷若服人之心故春秋謂武有七德所以

王師一出若時雨之降旱歲也然猶聖人不得已而用之今陛下承文景理平之運海內豐富時和民安胡不端居穆清垂拱而理上法堯舜禹湯之德使渙汗之令一發天下若風行草靡而自躬勞聖駕親董戎行頓兵於瀉鹵之地豈不聞先帝却千里馬罷露臺而遠人自歸仁乎況兵不苟聚戰不幸勝苟聚則財耗而民困幸勝則害多而利寡設使陛下得匈奴之地譬如石田何所用也臣雖愚篤竊為陛下不取武帝不悅事邊益急

由是伐朝鮮驅林胡取莎車滅葉護連年不息海內空
匱乃下令鬻爵得以補吏入粟得以免徭用度未足遂
取管權之利算及舟車而民益困搜粟都尉諛上而言
利不已請田輪臺帝方大悟追往年邊吏之辭下哀痛
之詔命封富人將以息天下然因耗已甚矣

咸平集卷二十二

欽定四庫全書

集部

咸平集卷二十三至
五

詳校官國子監司業臣納麟寶

檢討臣何思鈞覆勘

總校官知縣臣楊懋珩

校對官中書臣葉蘭

謄錄監生臣王廷璧

欽定四庫全書

咸平集卷二十三

宋 田錫 撰

表一

謝御製和祝聖壽詩表

臣錫言今月十七日宰臣瓊赴中書伏蒙聖慈宣賜御
和臣所進乾明節祝聖壽詩二十韻者俯拜皇恩仰窺
睿藻駭凡目而怔忡失次閱聖文而榮抃交并中謝伏
以華封慶祝之辰里社呈祥之節頌聲合貢忠懇冀伸

豈謂皇帝陛下降御製而頒宣命台階以錫賜始懽呼
而跪受終惕厲以退思且書曰賡歌詩稱大雅但美昇
平之際會或揚德業之形容未聞臣下獻葑菲之辭君
上答英華之什斯實皇朝新事玄貺殊恩用紀瑤編六
義常彰於睿思式光寶運千齡永固於昌期臣無任感
恩荷聖榮耀兢惶激切屏營之至

進籍田頌表

臣錫言伏以東郊之儀籍田之禮歷代久廢明詔復行

闕典既修無文咸秩三農知勸詎忘稼穡之勤萬乘親
耕將備粢盛之薦凡居率土孰不懽呼臣中謝伏惟皇
帝陛下體天覆育並日照臨以百姓而為心慮一夫之
失所講求典禮咨訪闕遺導其衣食之原務以農桑之
本祥符交薦上瑞必由於豐年王道已融聽政尚勤於
日旰以為籍於千畝禮有三推耒耜寘之於輅車種稔
獻之於宮禁表身先於貸殖果德動於昭回嘉雪應期
盈尺已豐於渥澤大田將稔載歌方美於京坻易曰先

天既便蕃於景貺書稱固本乃勉勵於羣情將以致孝
享於宗祧貽慶賴於黎庶聖朝師古有以見勸農務穡
之心來業美談可以播下管登歌之曲臣幸逢昌運忝
列侍臣清禁續綸殊乏論思之用黃門進牘難偕體物
之詞敢不祇率鄙懷比求音於扣寂謳謠聖德因獻頌
以達誠固慙葑菲之文上躋冕旒之鑒然國家盛事已
聞野老之歌臣子為心合效華封之祝謹詣東上閣門
進籍田頌一首干冒宸嚴臣無任惶恐激切屏營之至

進文集表

臣錫言臣聞美盛德之形容謂之頌抒深情於諷刺莫若詩賦則敷布於皇風歌亦揄揚於王化下情上達周禮所以建采詩之官君唱臣酬舜典於是載賡歌之事既逢清世何讓古人木鐸求規諷之詞彌光聖德金門獻芻蕘之說式表忠懷中謝伏惟皇帝陛下以唐虞莫大之德修湯武無敵之仁富壽於生民慈儉曰至寶塗山高會執玉帛者華戎瑞牒載書萃郊數者麟鳳讓圓

靈以立德推臣下以赤心皇勲帝功可以封泰山而禪
梁甫至德大業可以作韶樂而建辟雍永隆千載之基
高冠百王之業伏念臣藝文素淺學識非精逢時悞受
於聖知中第早塵於睿鑒代耕以祿歷試諸艱初命授
將作監丞再命歷左右遺補遇郊丘之恩澤轉記事之
班資尸素為虞廉勤益勵仍念策名之歲親聞金石之
言常令各守謙和莫忘筆硯邇後或漳濱近郡或江外
遠官莅事之餘修辭敢怠况帶史臣之職慮孤英主之

知嘗因壘嶂危樓既登高而必賦釣臺淺瀨亦倚棹以
成詩豈唯抒子年戀闕之心其實歌文王南國之化菁
英雖寡編綴靡遺三度拜章聊舉歲規之職八年外任
復歸侍從之班因輒上言卻乞在館蒙聖恩之俞允仍
舊貫以編修清閣濡毫愧乏素臣之作丹墀珥筆慚非
右史之才陛下旣以文學知臣臣敢不以文字報答陛
下今錄得在睦州編集中歌詩賦頌共十軸謹詣東上
閤門進獻播樂章於金石文彩非工祈睿鑒於冕旒罪

尤可待干冒宸扈臣無任惶恐激切屏營之至

進河清頌表

臣錫言伏覩中書門下奉宣示澶濮二州奏今月五日
黃河清者伏以千年之運聖祚方興四瀆之中洪河為
長波瀾清泚表嘉瑞以無疆圖牒昭宣協皇家之有感
中謝伏惟皇帝陛下唐虞至德湯武聖功夕惕勞懷掩
文王之勤儉夙興求理侔大禹之諮詢是以王道融明
猶日中之臨照鴻猷浹洽比天覆以恢崇南北綏懷邊

防久靜黎元富庶風俗還淳裡宗類帝以嚴恭繼祖承
祧以祇慄公田載籍將以奉清廟之粢盛闕典咸修將
以報先農之功烈萬邦玉帛方會於觀耕九曲河源遠
聞於飛奏勾芒應律東風已泮於輕冰川后呈祥習坎
不生於濁浪虛明洞乎鑒物清潔可以濯纓潤下朝宗
示寰區之靜謐儲靈効祉知社稷之感通何讓重華臨
觀授出圖之異堪唾孝武中流告沈玉之誠宜播登歌
永光信史豈青雲干呂能昭文物之朝滄海無波更表

聲明之化佇候白茅藉用薦三脊於泰壇明水潔清首
五齋於玄酒告成功於東岱示底貢於西鯨升中秘玉
檢之封永久嗣瑤圖之盛臣才非典誥職忝續綸文翰
是司豈稱代言之用頌聲合貢用彰盛德之容謹詣東
上閭門進河清頌一首干冒宸嚴無任惶恐抃蹈激切
屏營之至

賀德音表

臣錫言今月二十一日刑部連到德音已畫時施行訖

伏以絲綸作解之恩非時霽霈華夷至和之感向日歡
呼中謝伏惟皇帝陛下神道如幾文明以理金玉必貞
於王度璣衡以奉於天時宜乎二儀萬靈祥瑞交薦五
風十雨稼穡屢豐所以畜上帝之高明思下民之勞苦
念其闕乏或貸以餘糧卹其罪辜或省乎庶獄尚疎法
網用滌恩波取連山宥罪之文行出綽青災之令重刑
減降殘賦蠲除仍寬聚嘯之徒俾啟自新之路人心感
悅春雲護肅殺之威帝德昭宣秋日麗清光之彩臣忝

分憂寄方遠丹墀臣無任忤蹈激切屏營之至

二

臣錫言今月九日夜遞中刑部牒連到德音減降釋放
罪戾者伏以歲時更始制旨惟新協陽春以布和與品
彙以覃慶凡在臨照孰不歡呼中謝伏惟崇文廣武聖

明仁孝皇帝陛下為政以德守位曰仁明義以禁於民
非推恩式致於刑措是以號令渙發當王正視朔之辰
動植咸亨應天道施生之候詔命朝出寰區夕周重刑

遞降於徒流輕罪悉從於釋放山林聚集之盜容以歸
還城池失守之臣許令引見物情舒泰聖德融明躋人
於仁壽之區致理成升平之化臣忝分符竹屢換星霜
近奉詔書即歸丹闕拜聽德音之宣諭躬先士庶以歡
呼仰聖人之道如日中慶王者之恩及天下臣無任抃
蹈激切屏營之至

賀正表

臣錫言伏以千載良辰三陽令朔東風入律雲韶諧太

簇之奇北闕稱觴簪紱慶華封之祝伏惟尊號皇帝陛下
下明融瑞日德動玄穹皇極中庸納生靈於壽域青陽
左个布政令於明堂璿樞頡頏正始之文寶歷永無窮之
祚臣忝膺重寄方遠明庭無任瞻天祝聖抃蹈激切屏
營之至

賀冬表

臣錫言伏以氣序方周陽和來復祥雲五色映瑞日以
堪書丹鳳九苞應黃鍾而率舞伏維法天崇道皇帝陛下

下膺乾納祐與天同休臣叨奉詔條出分重寄土圭測
影空傾葵藿之心玉殿歡呼莫與鵷鴻之列臣無任瞻
天祝聖抃蹈屏營之至

二

臣錫言伏以一陽草故萬彙鼎新雲物呈祥珥筆可書
於魯觀日華表瑞測圭增麗於堯階伏惟尊號皇帝陞
下德合穹蒼功宣造化聰明文思之道光被華夷陰陽
寒暑之機昭垂言動玉瑄慶復長之節瑤圖膺惟永之

期臣叨奉朝章出分郡寄黃鍾應律空馳率舞之心景
殿稱觴莫與歡呼之列臣無任瞻天祝聖抃蹈激切屏
營之至

進乾明節祝聖壽詩表

臣錫言伏以節逢降誕運屬升平禹貢萬邦賀紫禁延
齡之慶漢官百辟有黃金為壽之儀若以詩綺靡於緣
情頌形容於盛德上采賡歌之旨旁宗大雅之詞律以
新聲文之近體為理世變風之什慶良辰繞電之祥用

表精虔實符忠願中謝伏惟皇帝陛下睿聖凝圖文明
致理三雍禮樂敦風教於昌期萬國黎元悅仁和於太
古封人受賜歡呼祝壽之時丹鳳有靈鼓舞聞韶之際
伏念臣素無文藝叨受皇恩備位諫垣未舉箴規之職
出官河朔慙非經畧之才子年雙闕之心欣逢令節堯
帝千齡之福願與稱觴情動於中詩聲於外因成乾明
節祝聖壽七言詩十九首謹繕寫進呈干冒宸聰臣無
任瞻天戀聖慶抃激切屏營之至

謝勅書獎諭上章表

臣錫言臣今月十九日伏奉勅書以臣所貢封章特加獎喻仰荷皇明之鑒寧勝光寵之詞榮抃徬徨啟處無地中謝臣聞敢諫非易納諫尤難蓋以臣下抗言多致觸鱗之怒帝王至貴駭聞逆耳之言苟非天鑒昭彰臣誠果敢何以見聖主優容之德何以伸直臣塞諤之心所以陶唐盛時猶設登聞之鼓有虞至理許書告善之旌蓋思誘敢言之臣亦欲聞未知之事伏念臣遭逢陞

下塵忝諫官雖精誠之中思有所報而激切之志未有所伸近者伏蒙聖恩榮有差遣當金殿入辭之際泊天階宣上之時遂以實封直進御座小臣愚昧所見尋常妄言軍國要機朝廷大體退而恐懼伏待誅夷然於忠亮之心少贖貪饕之罪豈期聖造特軫皇慈優降詔書褒稱賤品仍頒御劄宣示羣臣見皇王鑒燭之明示天地包容之量朝廷雖理而陛下未以為理黎庶雖安而陛下未以為安自此言路洞開朝綱益整所謂堯惜一

夫之不獲舜於一善而悅聞成湯之德益新大禹之謨
自遠太平已致比屋可封豈獨微臣之榮諒實天下之
幸臣無任感恩荷聖激切屏營之至

謝除右補闕

臣錫言臣今月二十日於天雄軍得河北南路轉運副
使李瑄差軍將齎送進奏院遞到官告一通勅牒一道
伏蒙聖慈授臣右補闕餘如故者綸言進秩諫省增榮
祇荷寵章徬徨交積中謝伏念臣叨居侍從有玷清華

薄才悞受於聖知非次驟分於憂寄積粟備邊之策豈
是所能豐財利國之謀又非素習伏遇禮行清廟功告
園丘慶澤惟新雖下周於庶品優恩特異俄叙轉於華
資臣每讀唐書載觀名士裴度蘊三公之業歷此清途
吳兢有良史之才當茲衰職臣識非淹邃辭媿菁英直
館踰年未舉編修之職乘輅將命俄兼飛輓之司微効
弗伸榮遷驟至太平無事忠言寧補於皇猷封禪有期
覲禮但思於丹闕臣伏限所守不獲奔詣宸階無任瞻

天戀聖感恩激切歡呼屏營之至

賀曹彬奏勝捷表

臣錫言今月七日進奏院狀報三月十七日并州鴈門
兩路前軍都部署侍中曹彬等奏三月八日并十日殺
下契丹二千餘人餘三千餘人中傷其餘竝皆逃遯并
涿州寰州等偽命官吏率百姓僧道歸降已安撫訖者
伏以皇威大振戎捷遐聞才興貔虎之師遽破鸛鵲之
陣照臨所被歡抃皆同

中謝

伏惟尊號皇帝陛下撫寧

萬國底定三邊武經方詠於止戈文德誕敷於振鐸尚
以薊門遺俗久不隔於邊庭燕朔舊疆宜復歸於王畧
安邊上策或伐叛以懷來命帥嘉謀亦乘機而破敵滹
水朝宗之浪方鼓威聲藁街獻捷之音載光睿算臣伏
限所守不獲奔詣闕廷無任瞻天戀聖歡呼激切屏營
之至

賀潘美奏勝捷表

臣錫言今月十三日進奏院狀報三月十九日至二十

日雲應幽朔等州行營都部署太師潘美等奏偽命節
度副使趙希贊等率軍民一萬五千餘人歸降并飛狐
北殺下敵軍三萬餘人活捉到偽命冀州防禦使朱鵬
翼康州刺史馬贊已下及收到衣甲器械羊馬牛畜牌
印等不少者伏以睿算無遺王師繼捷塞外之飛章疊
至寰中之吉語交聞中謝伏惟尊號皇帝陛下聖德昭
彰天機果斷垂衣裳而致理治即用文利弧矢以宣威
動惟經武狼星未滅宜鈇鉞以專征虎旅爭先鼓雷霆

之奮怒佇係單于之頸郊廟獻俘即覃英主之恩策勲
飲至車書混一歷數登三表瑤圖保大之功行玉檢告
成之禮臣限拘外任恭聽捷音無任歡呼慶快激切屏
營之至

賀容懷意奏勝捷表

臣錫言今月十七日進奏院狀報三月二十五日至二十六
日內品容懷意等走馬到闕奏大軍於涿州南殺下敵
軍一千餘人并應州及飛狐軍偽命官吏率所屬二萬

餘人歸降收到衣甲鞍馬錢帛糧草不少者伏以廟朝
決勝將帥成功西被東漸益震威加之令一月三捷未
如神速之謀凡被照臨同深慶快中謝臣聞周稱獫狁
漢曰匈奴負恩則違背驩盟肆暴則侵撓邊鄙苟非皇
威景鑠王道融明授金鉞以專征出玉關而拓境則何
以致窮邊族類來朝禮義之鄉瀉鹵山川復正要荒之
服伏惟尊號皇帝陛下至仁無敵我武惟揚以帝堯丹
浦之師破匈奴白登之衆未踰浹日連下數城豈煩築

壘以受降但慶獻俘而執馘飲馬長城之窟金石登歌
鳴鸞日觀之峯人神共悅臣任當求瘼職忝記言屢聞
奏捷之音限遠對敷之列臣無任惶戀歡呼激切屏營
之至

賀潘吉奏勝捷表

臣錫言今月二十六日進秦院狀報外殿直潘吉今月
三日走馬到闕奏三月二十八日大軍到靈邱城下偽
命官屬七千餘人歸降收到衣甲器械錢帛糧草不少

者伏以王者之師有征無戰廟謀之勝一舉萬全捷音
屢下於邊城喜氣彌高於率土

中謝

伏惟尊號皇帝陛

下日新聖德天贊皇勲舜干方舞於兩階禹會悉朝於
萬國蠢茲小敵敢遣靈誅勞將帥以專征出車徒而薄
伐天山牧馬瀚海洗兵我師無遺鏃之勤彼寇有絕絃
之敗燕然銘勒信千載之一時梁甫秩邊侯八鸞之肆
覲臣亟聞飛奏但切歡呼白日傾葵藿之心滄溟繫匏
瓜之迹不獲隨例蹈舞闕庭臣無任慶快惶戀激切屏

營之至

賀李規奏勝捷表

臣錫言今月三日進奏院狀報四月九日外殿直李規走馬到闕奏大軍收下雲州殺戮賊軍並盡所有百姓並依聖旨存留安撫訖并收到衣甲器械鞍馬錢帛糧草極多者伏以王師乘勝戎壘克平盡白日之照臨慶皇家之勝捷中謝伏惟尊號皇帝陛下恩流萬國威馭四裔執玉塗山獫狁曠宥王之禮洗兵瀚海嫫姚成破

敵之勲嬰城固守者必誅後昭蘇者即赦果霈涵濡
之澤俾新汙染之民七德彰明三邊靜謐佇魁渠之係
頸生致闕庭用億兆以為心躋於壽域臣忝分朝寄遠
在海涯恨無羽翼以奮飛徒仰天顏於咫尺臣無任惶
戀歡呼激切屏營之至

賀張明奏勝捷表

臣錫言今月七日進奏院狀報四月九日至十一日外
殿直張明等相次走馬到闕奏大軍於新城東北并蔚

州南飛狐口殺下敵兵二千餘人活捉到四百餘人收
到鞍馬衣甲器械不少內外文武臣僚取十三日稱賀
者伏以細柳出兵仗皇威而必勝甘泉舉燧與飛走以
俱來凡聞克捷之音共慶蕩平之策中謝伏以王者用
刑之理叛則先誅遠人伏莽之心困猶思鬪伏惟尊號
皇帝陛下兆民子育六合為家孚大信於豚魚薰至和
於草木所以嘉禾生而靈芝出白雉貢而丹鳳來蠢茲
種落之人不奉朝廷之化敢背恩信尚肆陸梁勞沙塞

以驅除汚霜鋒之殺戮雲驅電掃輟亂旗靡委戈甲以
谷量收馬牛於風逸猛將與謀臣之捷青史書勲三公
率百辟以朝黃金上壽臣忝分憂寄屢聽邊功美盛德
之形容空思作頌慶吉音而鼓舞莫覩獻俘臣無任歡
呼惶戀激切屏營之至

賀簡昌壽奏勝捷表

臣錫言今月十一日進奏院狀報四月十八日內品簡
昌壽走馬到闕奏大軍於飛狐北口下塞有敵兵救援

蔚州尋趕趨二十餘里殺下首領二人并殺契丹三千
餘人捉到馬三百餘匹收到衣甲器械不少者伏以驅
除他族恢復邊陲四方聞勝捷之音千載慶升平之運

中謝

伏惟尊號皇帝陛下功超邃古道掩前王念汙俗
之來蘇軫漁陽之未下風雷威令體天道之惡盈擊鼓
戒嚴謀帥臣之薄伐追奔逐北斬馘獻俘以敗不相救
之敵兵立舉則必成之功策佇清氛祲即詠凱旋漢家
無烽火之虞禹畫正要荒之服臣限違朝闕叨守詔條

陪壽觴稱慶以無由望魏闕歡呼而但切臣無任抃蹈
惶戀激切屏營之至

賀張冲奏勝捷表

臣錫言今月十六日進奏院狀報四月二十五日張冲
走馬赴闕奏大軍在蔚州城下有城內壯丁許彥欽等
結連本城兵士五千餘人殺逐出契丹首領蕭呼哩及
捉到偽命同州節度使充蔚州鹽城使耿紹并男孫共
四人把定城池歸明尋入城安撫者伏以廟社垂靈邊

疆克復三軍勇勝之勢迅如疾雷萬方慶快之心融為

和氣

中謝

伏惟尊號皇帝陛下體法玄穹建用皇極勝

妖以聖明之德禦侮行仁義之師禹別九州祈連遠居

於荒外唐分十道雲嵐近在於河東秉性不常款誠易

變中原多事叛違則輒肆侵漁聖主臨朝攻取則自然

敗衄城中士庶或逐出於名王塞外貌貅或生擒於渠

帥斯乃天贊平戎之策神資無敵之謀致彼人心自相

矛盾成我國討不動干戈金微玉闕復置羈縻之郡柳

秋杜落佇旋邏逆之兵昭彰聖功歌詠睿德臣伏限所
守恭聽捷音阻觀露布以獻俘但仰雲天而拜慶臣無
任歡呼惶戀激切屏營之至

賀盧漢贊奏勝捷表

臣錫言今月二十三日進奏院報十二月二十五日代
州駐泊副部署盧漢贊等差高班內品李延遇入奏契
丹諸軍入界打刼尋於土鎧寨殺下敵兵聽到首級二
千餘個活捉到契丹五百餘人馬一千餘匹及殺下北

大王男一人監軍錫里一人首級奪到牛羊車帳衣甲
器械不少者伏以方隅勝捷之音天聰遠達華夷歡呼
之列日域遐周中謝臣聞邊鄙之虞有備無患契丹之
性驅去復來是資邏逆之兵時聞克捷可賞嫖姚之將
屢獻功勳伏惟尊號皇帝陛下道德為藩慈儉曰寶王
度貞明於金玉皇風混一於車書蕃服來朝必飾藁街
之館匈奴入寇即興榆塞之師用憲章五帝之謀得駕
馭四裔之術俘囚操袂郊廟登歌彰軍禮之允修見睿

謀之不測臣方膺詔旨將赴闕庭臣無任瞻天望聖歡
抃激切之至

咸平集卷二十三